

Yëkkuö skà kit Pablo tö Timoteo a, i' tã ide böt

2 Timoteo

Pablo bak wötëulewã Roma s'wöto wé a, e' yënetsã duas dabom teryök ena teryök kî böt Jesús kune'bak e' ukuökî (60-62 DC) e' ulatök. E' ukuökî tã ie' skà mineã Jesús tté buaë pakök i' tã ide tkëtökicha. E' kèwö ska' ie' tö yëkkuö tsá kit Timoteo a ena Tito a. E' ukuökî tã wëm kiè Nero e' yöne Roma blúie etã Pablo skà wötënewãne s'wöto wé a. Mik ie' tso' wötëule e' dalewa ie' tö yëkkuö i' kit Timoteo a. I' ëtökicha Pablo wötënewã kuã'kî. Kewe ie' bak wötëule iwák u a. I' ëtökicha ie' wötënewã kã suluë ena sësëë ese a. Nies ie' monewã tabechka kicha wa. Ie' wã ijcher tö e' dör ie' kanè bata, e' kuëkî yëkkuö i' kit ie' tö Timoteo a. I' es ie' tö ikit. Et: Pablo ittësë' tö ie' atë ekörla e' kuëkî ie' siánewã. Wëpa kiè Figelo ena Hermógenes dör ie' wapiepa e'pa tö ie' méat. Nies wëm kiè Demas e' ena imalepa skà tö ie' méat. E' kuëkî ie' kî ikiane tö Timoteo bitu bet ie' kímuk.

Böt: Jesús mik erblökwakpa we'ikeke siarë Roma blú ñe' tö, e' kî Pablo tkirke tajë. E' kuëkî ie' tö Timoteo patté tajë tö ie' kawötã e' tkökwa darërë Jesús tté a. Nies ie' tö Timoteo a ichè tö ie' kawötã Jesús tté buaë e' kî wa s'wöbla'uk. E' kîieta ie' tö Timoteo a ichè tö ie' kawötã e' chöktke weinuk Jesús tté buaë kuëkî.

Yëkkuö i' tö se' a ikkachè tö wes se' kawötã senuk Jesús a. Nies se' a ichèitö tö se' kawötã e' chök weinuk Jesús mik erblë kuëkî. Wëlepa tö ibikeitsè tö i' dör yëkkuö bata kit Pablo tö e'.

Shkë'wè

1 ¹Ye' dör Pablo. Skëköl wák er wa ye' dör Cristo Jesús ttekölpa tsá, e'pa eköl. Ie' kablé sene michoë muk wépa batsulewã Cristo Jesús mik esepa a, e' tté pakök ye' patkë'itö. ²A Timoteo, ye' tso' yëkkuö i' shtök be' a. Be' dalër tajë ye' éna wes ye' wák alà es. Skëköl dör S'yé ena Skëképa Cristo Jesús, as e'pa er buaë chò be' a ena be' saù er siarë wa ñies sene bèrë mù be' a.

Pablo wěstela ché Skëköl a Timoteo dalërmik

³Skëköl dalöieke ye' tō erbike maneneë wa wës ye' yépa bak ká iaiaë idalöiök es. Këkraë mik ye' ttöke ie' tã ñië nañeë, etã ye' er arke be' ska' tã wěstela chekeyö be' dalërmik. ⁴Mik ye' minea, etã be' ii' siarë. Mik e' anewa ye' éna, etã ttsësua ye' mú be' suène as ye' tsë'rne buaë. ⁵Ñies ye' éna iane tō be' erblöke Jesús mik er moki wa. Ye' wã ijcher buaë tō be' erblöke Skëköl mik wës be' wi'kela Loida ena be' mi Eunice e'pa erblë'imik kewe be' yöki es.

Kè be' jaënuK Jesús tté buaë pakök

⁶E' kuëki ì me' Skëköl tō be' a kanebloie ie' a mik ye' ulã me'kã be' ki etã, e' kè olo'yar, e' kí wakaneu bua'iewã. ⁷Skëköl kè wã se' a iWiköl mène as se' suar. E' skéie iWiköl tō se' a diché mé senoie yësyësë ie' a, ñi dalëritsoie, ñies erbikoie buaë yësyësë. E' kuëki be' kaneblo Skëköl a kè suarta'. ⁸Kè be' jaënuK Skëképa Jesús tté buaë pakök. Ñies ye' tso' wötëule Jesús tté pakè kuëki, e' kè ki be' jaënuK. E' skéie ye' tō be' a ichè tō be' e' chó se' weirke Jesús tté kuëki e' dalë'ttsök ye' tã Skëköl diché wa.

⁹Skëköl wák tō se' tsathtë'ttsã

ñies ie' tō se' klöo' senuk batse'r ie' a.

E' kè dör tō se' tō ì buaë wé ie' a e' skéie.

E' dör tō ie' wák tō ibikeitsé es tã iwawëitö,

ie' er buaë chè se' a, e' kuëki.

Kã kã i' yör e' yöki ie' tō ibikeits

tō ie' er buaë chöraë se' a Cristo Jesús batamik.

¹⁰Cristo Jesús dör S'tsathtëkwak e' dë'rö kã i' a

se' a ikkachök tō Skëköl er buaë ché se' a.

Ie' kôtewã shkenekãne, e' wa ie' tō iwã kkaché

tō ie' e' aléka duëwã ki.

Ie' tté buaë e' tō se' a ikkacheke

tō se' kè duöpawã da'a,

e' skéie sene michoë döraë se' ulã a

ie' tté buaë e' batamik.

¹¹Tté buaë e' wã pakök ena s'wöbla'uk iwa Skëköl tō ye' klöo' Jesús ttekölpa tsã e'pa ekölie. ¹²E' kuëki eré ye' weirke, eré ye' kè jaëne e' ki. Yi mik ye' erblöke, e' mik ye' bätse buaë, e' dör Jesús. Ye' wã ijcher buaë tō kanè me' Skëköl tō ye' a e' kkö'neraë ie' wák tō dö mik Skëképa Jesús datskene etã. E' kuëki ye' kè jaëne weinuk ie' dalërmik.

¹³Tté yësyësë wa ye' tō be' wöbla' e' wã iütó. Be' e' tkówã darëreë erblök Jesús è mik. Ñies s'malepa dalëritsó Cristo Jesús batamik. ¹⁴Tté mokië mène be' a, e' wã kkö'nú buaë Wiköl Batse'r tso' se' a e' wa as kè yi tō imane'üttsã.

¹⁵Be' wā ijcher buaē tō s'yamipa serke Asia, e'pa seraa iekkē tā ye' watē'ttsa, e'pa bōl kiē Figelo ena Hermógenes. ¹⁶Erē Onesíforo kē jaēne ye' tso' wōtēule e' kī. Kēkraē ie' tso' ye' er pablōk. Aš Skēkēpa Jesús tō ie' ena iyamipa saū er siarē wa. ¹⁷Mik ie' de íe Roma, eṭa ie' tō ye' yulē poē tā ye' wakuéitō. ¹⁸Skēkēpa Jesús datskene, mik e' kēwō de eṭa as ie' tō Onesíforo saū er siarē wa. Be' wā ijcher buaē tō wekkē ie' tō se' kime' Éfeso.

Be' weirke Jesús ttē kuēkī e' dalē'ttsó

2 ¹A Timoteo, be' dōr ye' alàie, Skēkōl er buaē chō se' a Cristo Jesús batamik, e' mik be' e' diché ió. ²Wēpa ttō mokīē dirmi buaē s'wōbla'uk esepa yuló tā ì yē'yō s'yamipa tajē e' kukua, ttsē' be' tō ese wa ie'pa wōbla'ú as ie'pa tō s'malepa wōbla'ù iwa.

³Se' weirke Cristo Jesús ttē kuēkī, ese dalē'ttsó darērē wēs nīppōkwak buaē tō iweirke kōs e' dalē'ttseke es. ⁴Mik nīppōkwakpa tso' ikanē a, eṭa ie'pa kē ku' e' tiuk ì kua'kī a as iwēr buaē iwōkir wa. ⁵Es nīes wēpa inuke esepa kawōtā ittē iutōk buaē. Kē iwā iutēne, e' tā kē e' alòpaka. ⁶Wēpa kanēblōke darērē íyi kuatkōk, esepa ulà a iyiwō tsá dōraē kewe. ⁷Ì cheke ye' tō be' a ttē i' wa, e' wā bikeitsó buaē tā Skēkēpa Jesús tō be' kīmeraē as be' éna iwā kōs ar buaē.

⁸Be' tō Jesucristo bikeitsó me'rie. Ie' dōr se' blú bak ká iaiaē kiē David e' aleri. Cristo kōtewā shkenekane, e' ttē buaē pakeke ye' tō. ⁹Ttē buaē e' kuēkī ye' weirke siarē. Ye' tso' wōtēulewā moulewā s'wōto wé a wēs pē' sulusipa es. Erē Skēkōl ttē e' kē ku' wōtēulewā. ¹⁰E' kuēkī ye' tō ì kōs dalē'ttseke wēpa shukitbak Skēkōl tō esepa kīmoie as ie'pa tsatkēr ena olo yōbiē dō ie'pa ulà a Cristo Jesús batamik.

¹¹Ttē i' dōr yēsýēsē:

Se' bàtsewā Cristo kōtewā, e' tā nīta,
e' tā se' ser michoē ie' tā nīta.

¹²Se' weirke Cristo dalērmik, e' dalē'ttsésō,
e' tā nīes se' dōraē s'wōkirpaie ie' tā nīta.
Se' tō ichē s'malepa a tō se' kē dōr Cristo icha,
e' tā nīes ie' tō icheraē aishkuō tā tō se' kē dōr ie' icha.

¹³Ie' wák kē a e' watēnuk,
e' kuēkī erē se' tō ie' watēmittsa,
erē ie' kē tō se' watepattsa.

Be' kanēbló as be' wēr buaē Skēkōl wa

¹⁴Be' tō ttē ekkēpa chó ie'pa a as ie'pa er arne iska' kēkraē. Ie'pa pattó Skēkōl wōrkī tō a' kē kàne nī wōtkōk nīē ttē ēse kī. E' kē dōr ìie bua'. E' tō wēpa tso' ittsok esepa sulu'wekewā. ¹⁵Be' e' chó kanēblōk Skēkōl a buaē

as ie' wa be' wër buaë. S'wöbla'ú yësyësë ttè mokië e' wa, kè shiliwar shilitshilit as be' kè jaërka be' kanè kî. ¹⁶Kapakè kè dör Skëköl dalöioie, kè wà tã', ttè ese kôs yökî be' e' skóttsa. Ttè ese tó se' wëttsëmi ì sulu è a, kè tó Skëköl ttè iütëia. ¹⁷Ttè ese tó s'sulu'wëwami wes smewö tó s'katè es. Wëpa bül kiè Himeneo ena Fileto e'pa s'wöbla'weke kache tté wa. ¹⁸Ie'pa tó ttè moki watëttsa. Ie'pa tó s'wöbla'weke kache tté wa. Ie'pa tó icheke tó mik se' wöskuée, etã e' dör wes se' wiköl du'wã shkenekanetke Skëköl a es. E' kuëki mik se' duowa, etã se' nu kè shkerpakane aishkuö tã. Ttè e' wa ie'pa tso' welepa er sulu'uk tã kè ierblöiarak Jesús mik. ¹⁹Ie'pa tó s'wöbla'weke kache tté wa, erë Skëköl ttè dör moki e' kè manertã', e' kè wötirtã' wes ák blubluë kè wötirtã' es. Itso' kitule Skëköl yëkkuö kî, e' tó ichè: “Wëpa dör Skëköl icha, esepa suule ie' wã buaë.” Nies e' tó ichè: “Wëpa iché tó ie'pa dör Skëköl icha, esepa kawötã ì sulu kôs wamblekerakitö e' olö'yök.”

²⁰Inuköl blu' u a tka' tso' daklilië welepa yöule orochka wa, inukölchka wa, ese dör tka' bua'buwa ikawö tkö'uke buaë ese tkéie. Nies u e' a tka' èse tso' yöule skauchka wa, nies kal yöule tka'ie ese dör tka' èse. ²¹Es se' dör. Se' e' kkö'nuke ì sulu ñe' yökî, e' tã se' dömi wes tka' bua'buwa maneneë es, batse'oule, dör buaë se' Blú a iyi ulitaneie tso'tke ì kôs buaë ese woie ie' a.

²²Ì sulu wamblak duladulapa éna, ese kôs yökî be' tkóshkar. E' skéie be' e' chó senuk yësyësë. Be' kî erbló Jesús mik. S'malepa dalëritsó. Nies be' senú bèrë sulitane tã. E' kôs yuló s'malepa tó Skëképa chakè er maneneë wa esepa kôs tã ñita. ²³Ttè kè wà tã', ese kabewekerakitö, e' kè iutar be' tó. Be' wã ijcher buaë tó ttè ese tó sulu se' ké ñippök. ²⁴Skëképa Jesús kanè méso kè kawötã e' tiuk ñippè a. E' skéie ese ké senuk bèrë sulitane tã. Ese a s'wöblarmi buaë Skëköl ttè wa, sulitane dalë'ttsekeitö er bua' wa. ²⁵Wëpa kè éna ttè moki iütak, esepa kawötã shulëitö er bua' wa, isalema wëkké alè tã ie'pa er mane'umi Skëköl a tã iyörmine ttè moki wa. ²⁶Ie'pa er mane'wéne, e' tã es ème ie'pa tkömishkar bé ulà a. Ie' wã ie'pa tso' klöulewã wes dúla klöulewã sho' a es as ie'pa e' wamblö wes ie' kî ikiane es.

Mik kã i' erkewa, etã s'ditsö e' wamblöraë suluë

3 ¹Be' kawötã wã ijchenuk tó mik kã i' erkewatke, etã kawö suluë datse tajë s'kî. ²Pë' wák è e' dalëritsöraë. Ie'pa er murawã inuköl kî. Ie'pa e' ttsörakã tajë, kè tkirpa yi skà kî. Ie'pa ñi chöraë suluë. Iyé ena imì, e'pa ttò kè iuteparakitö. Ie'pa er suluë, kè wëstela chepa yi a. Ie'pa kè tó Skëköl dalöiepa. ³Kè er ttsè'rpa buaë yi kî, kè er buarpane yi kî. Ie'pa biyöblöraë tajë. Ì sulu datse ie'pa er a, ese wà wamblöraë ie'pa tó. Ie'pa tó s'we'ikeraë siarë. Ì buaë kôs sueraë suluë ie'pa tó. ⁴Iyi sulu wamblöraë akirie, iyi wamblöraë kè ulé klöule. Ie'pa e' ttsörakã tajë shutëë. Skëköl

kè dalëritsepaitö, e' skéie ì tso' ká i' a s'ttsë'weke buaë, ese è wa ie'pa wöbatsöraë taië. ⁵Ie'pa e' ò tò mokië Skëköl dalöiekerakitö, erë wës ie' wamblörak e' wa iwënewä tò e' dör kache.

Esepa yöki be' e' kkö'nú. ⁶Wëpa esepa welepa micho u èt u èt ta iwachekerakitö tò itso' s'pattök, erë e' dör kache. Ie'pa tso' alakölpa kitër tottola esepa dakiñuk. Alakölpa esepa tso' klöulewä ì sulu wamblekerakitö ese ulà a. Ì sulu wa ie'pa wöbatsö, ese tò ie'pa erkiöweke taië. ⁷Ie'pa e' yuak ttè kuä'ki wa mirmir këkraë, erë Skëköl ttè moki kè ska' ie'pa er dë'. ⁸Ie'pa esepa tò Skëköl ttè moki cheke suluë wës ká iaiaë Janes ena Jambrés tò Moisés yë' suluë Skëköl ttè kuëki es. Ie'pa kè a kabikeitsia buaë. Ie'pa kè erblöku'ia mokië Jesús mik. ⁹Erë ì wambleke ie'pa tò, ese wà kè ká dõpa taië. Bet ta sulitane wa ijcherdawä tò ie'pa ttè e' kè wà ta' wës ibak ká iaiaë Janes ena Jambrés e'pa ta es.

Pablo tò Timoteo bata patté

¹⁰Erë ttè wa ye' s'wöbla'weke e' jcher buaë be' wa. Nies wës ye' ser, ì kiane ye' ki, wës ye' erblö Jesús mik, wës ye' tò s'dalë'ttseke er bua' wa, wës ye' tò s'dalëritseke, wës ye' weine e' kos dalë'ttsë'yö, e' kos jcher buaë be' wa. ¹¹Wës ye' yë'bak suluë pè' tò, wës ie'pa tò ye' we'ik siarë Antioquia ena Iconio ena Listra, e' kos sùule buaë be' wa. Ye' weinebak taië siarë erë Skëképa Jesús tò ye' tsatkë' e' kos yöki. ¹²Ttè i' dör moki: yi senak yësyësë wës Cristo Jesús ki ikiane es, esepa kos weirdaë siarë ie' ttè ki. ¹³Erë pè' sulusipa ena s'kitö'ukwakpa esepa ká e' wamblöraë suluë shute, s'kitö'uk ena e' kitö'uk.

¹⁴Erë be' e' tkówa darërëë këkraë ttè wa be' wöblaone e' a. Ttè e' dör moki e' jcher yësyësë be' wa. Wëpa tò be' wöbla' iwa e'pa sùule bua' be' wa, e' kuëki be' e' tkówaia këkraë. ¹⁵Es nies, mik be' ia alala, eta Skëköl yëkkuö bats'er e' sùule be' wa, e' a be' talane. Ttè e' tò be' a ikkachëmi tò Skëköl tò se' tsatkëmi se' erblé Cristo Jesús mik e' batamik. ¹⁶Skëköl yëkkuö kos, e' kitule yësyësë wës ie' wák tò ibikeits es. E' dör buaë se' a s'wöbla'woie, s'wöñoie, s'shuloie, nies ikkachoie se' a wës seneke yësyësë ¹⁷as wëpa dör Skëköl icha, esepa yö' buaë da'äie tso'tke ì buaë kos ese uk.

4 ¹Cristo Jesús datskene s'blúie ká i' a olo ta' taië s'blërulunebak kos ena s'tso' ttsë'ka kos esepa shulök. Ie' wöa ena Skëköl wöa, ye' tò be' a ichè tò be' ké ²ie' ttè buaë pakök kröröë, be' éna ipakak ö be' kè éna ipakak, erë ipakó këkraë. S'shuló, s'uñú, s'pattó, s'wöbla'ú ena er bua' wa. ³Kawö datse eta pè' kè tò Jesús ttè moki e' ttsepaia. E' skéie s'wöbla'ukwakpa yuleke ie'pa tò taië ie'pa wöbla'woie ttè wëse ttsak ie'pa éna ese è wa. ⁴Ttè mokië e' waterattsarakitö ta kapakè èse kos ese klö'werarakitö. ⁵Erë be' e' tkówa darërëë. Be' erbikó buaë yësyësë. Kos be' weirke e' dalë'ttsó buaë. Jesús ttè buaë pakó. Kanè kos me'at Skëköl tò be' a, e' wakaneú er bua' wa.

⁶Ye' duökewā, e' kēwō dōkewatke. Ye' a tā e' dör wes íyi mekesö Skëköl a idalöioie es. ⁷Ye' e' tkēwā darërëë kanè me' Skëköl tō ye' a e' a, e' wawéyō buaë, ye' e' batseitsé iwawoie kēkraë. ⁸E' kuëkì sene yësyësë ské, e' tso' blëule ye' a. Mik ikéwō de, etā imeraë ye' a Skëkëpa Jesús dör s'shulökwak yësyësë e' tō. Kè dör ye' è a, ñies e' dör wépa éna ie' dalër tajë ena itso'rak ie' datskene olo ta' tajë e' panuk esepa kos a.

Pablo ttè bata ché Timoteo a

⁹⁻¹¹Demas tō ye' méat, ì tso' ká i' kì e' dalërmik tā imía Tesalónica. Ñies Crescente mía Galacia ena Tito mía Dalmacia. Lucas è atē ye' tā. E' kuëkì be' shkó bet ye' weblök, kè be' e' wöklö'uk ì wa. Marcos yuló tā ikióbitu e' tā. Ye' kì ie' kiane e' kìmuk ye' kanè wa. ¹²Tíquico patkémíyö Éfeso. ¹³Be' we'ikèyö, mik be' datse, etā ye' paio kikküö me'atyö Tróade Carpo u a, e' tsúbitu ña. Ñies ye' yëkkuö me'at tseë, e' shuā wele tso', e' dör iyiwak kkuölit yöule yëkkuöie, ese kos kiane ye' kì, ttè bua'iewā tso' kitule ikì e' kuëkì, e' kos tsúbitu ña.

¹⁴Alejandro dör íyi yuökwak tabechka wa, e' e' wamblé suluë ye' tā. Skëkëpa Jesús tō ie' patueraë wes ie' e' wamblé es. ¹⁵Ttè buaë pakekesö e' ché ie' tō suluë. E' kuëkì be' e' kkó'nú ie' yökì ñies.

¹⁶Ye' tsá mine shulè s'wökirpa ska' etā kè yi dè' ye' kìmuk. Sulitane tō ye' méat ekörla. Skëköl mú kè tō ie'pa we'ikè e' kì. ¹⁷Erè Skëkëpa Jesús tō ye' kímé, ie' tō ye' a idiché mé as ye' tō S'tsatkókwak tté pakö sulitane tso' ee, kè dör judiowak, e'pa kukua. Es Skëkëpa Jesús tō ye' tsatkée ye' bolökpa éna ye' ttakwā e'pa ulà a. ¹⁸Ñies ie' tō ye' yerattsa ì sulu kos e' ulà a. Ie' tō ye' tserami ká jai a wé ie' tkër s'blúie ee, es ye' tsatkeraëitö. ile' kikkökasó tajë kēkraë! Es e' idir.

Pablo e' chéat

¹⁹Prisca ena Áquila ena Onesíforo yamipa, e'pa shké'ú ña. ²⁰Erasto e' tséat Corinto. Trófimo kirirke, e' me'atyö Mileto. ²¹Be' mú bitu kam tskiridiö dōwā e' yökì. Eubolo, Pudente, Lino, Claudia ena s'yamipa kos tso' íerö e'pa tō be' shké'wémi.

²²As Skëkëpa Jesucristo tso'ie be' tā. As Skëköl er buaë chò a' ulitane a tajë.